

12.8 tan metrik sisa e-waste dikutip

Dikumpulkan daripada penduduk di Pulau Pinang dalam tempoh dua bulan

Oleh MOHD ISKANDAR OTHMAN

PERMATANG PAUH

Sebanyak 12.8 tan metrik sisa buangan elektrik dan elektronik atau e-waste berjaya dikumpulkan di Pulau Pinang sempena sambutan Hari Alam Sekitar Negara.

Ketua Penolong Pengarah Jabatan Alam Sekitar (JAS) Pulau Pinang, Mohd Fitri Mohd Mokhtar berkata, sisa e-waste terbabit dikutip dalam tempoh dua bulan menerusi kempen pengumpulan buangan elektrik dan elektronik yang dijalankan dalam kalangan penduduk serta industri selain turut membabitkan institusi pendidikan di semua peringkat.

Menurutnya, kempen seperti ini dilihat memberi peluang kepada orang ramai untuk melupuskan sisa e-waste yang selama ini mungkin telah tersimpan sekian lama di dalam rumah mereka.

"Mungkin sebelum ini mereka tidak tahu bagaimana un-



Mohd Fitri (kiri) dan Harith Fadzilah melakukan gimik pengumpulan e-waste sempena perasmian Sambutan Hari Alam Sekitar Negara peringkat Pulau Pinang semalam.

tuk menguruskan sisa e-waste ini dan melalui kempen seperti ini kita dapat memberikan pemahaman cara melupuskan buangan tersebut.

"Kempen seperti ini dapat memastikan e-waste yang terkumpul daripada isi rumah dapat dikendalikan oleh operator yang dilesenkan secara selamat dan tidak mencemarkan alam sekitar," katanya ketika berucap pada Majlis Perasmian Sambutan Hari Alam Sekitar Negara peringkat Pulau Pinang di sini semalam.

Sambutan itu diadakan serentak dengan perasmian penutup Karnival Hijau 2020 yang diadakan di Politeknik Seberang Perai (PSP) di sini.

Hadir sama Pengarah PSP,

Sr Harith Fadzilah Abd Khalid.

Dalam pada itu, Mohd Fitri berkata, kempen yang bertujuan melestarikan alam sekitar itu harus diperluaskan lagi kepada semua masyarakat kerana tugas menjaga alam sekitar seharusnya menjadi tanggungjawab bersama.

Katanya, bagi tujuan itu Kementerian Alam Sekitar dan Air mengambil inisiatif dengan mencadangkan hari Sabtu terakhir setiap bulan diisytiharkan sebagai hari pengumpulan e-waste di seluruh negara.

"Inisiatif ini akan dimulakan Januari tahun depan dan diharapkan pengumpulan e-waste dapat dilakukan dengan lebih sistematik dan selamat," katanya.